

Qujanaq upernaakkut ataatsimiinnitsinnut

Inuiaqatigiit ikiliartortuniilluta politikeritut pisussaaffitta ilaa naammassivarput.

Siumumit iluarisimaarparput ataatsimiinnerup ilusilernerani milisiutaasumik aaliangiiffisassat oqallisissiallu akuleriinnerusumik inissinneqarnerat. Maluginiarparpulli sulii pitsaanerulersinneqarsinnaasoq qularutigingilarpullu siulittaasoqarfiup tamanna ilisimaarilluaraat.

Inatsisartut suleriaasiannik nutarterinissamik suliaqarluni ingerlatsisoqarnera qilanaaralugu Siumumit utaqqimaarparput, Nunatsinni tamat oqartussaaqataanerisa pitsanngorsarneqarnissaanit pisariaqarteqisatsinnik imaqtartussaammat.

Eqqortumik toqqammaveqarluni inatsisiliornerup pingaassusia pineqarmat;

- Paasissutissat eqqortut
- Paasissutissat tamaasa,

atorlugit suliarineqarnissaat pingaaruteqarnerpaatut Siumumit isumaqarfigivarput.

Ippassaq eqqarsaat inersuarmi apeqqutigineqartumut... pitsaanerpaamik ujartuuaannassaagut imaluunnit Kalaallit Nunaannut naleqquttumik aqqissuussissaagut?

Soorngunami Kalaallit Nunaannut naleqquttoq aqqissuussaq pitsaanerpaajuaannassaaq illuatungaa eqqumiippallaasaqaaq, Kalaallit Nunaannut naleqqussarneqarmat taava ajungilaq pitsaanerpaanngikkaluaruni?

Suleriaatsilli pitsaanerpaat atuleraluarutsigilluunnit maluginiagassaavoq oqallittariaatsip ingerlanneqarnera torinngippat allannguiniarnerup (tassa tamat oqartussaaqataanerup nukittorsarnissaa) sapangissavarput, immitsinnut piumasaqanngikkutta nammineq pitsaanerulerumalluta iliuusitsinni takutikkutsigu. Oqallinnermi ajugaanissaq periarfissatuannngorsimappat oqalliseqatinik naleerutsitsineq imaluunnit naleerunnerulersitseqqaarluni isummertarneq - taallugulu tassa politiki – tassunga pisimagutta mianersorfissatsinniilereersimavugut, uagut ullumikkut akisuussaaffimmik tigummiartaqartuusugut qinersisartunik qinerneqarsimanerput aallaavigalugu taamatut piumasaqaateqarsorilersimagutsigu.

Qinersineq taamatut piginnaatitsisutut atorneqalersimappat, allat apparsarlugit oqalulluta pitsanngorsaassasugut - Siumumit tamanna peqataaffigerusunngilarput.

Amerlanerussuteqarluarnerup mianerisassartaa Siumumit eqqumaffigivarput; amerlanerussuteqarluarneq atorneqanngisaannassaaq siutigut matoriarlugit aalajangersaanermik. Killissaa tikillugu isumaqatigisinnaasat amerlanerpaat qulakkeeqqaarneqassapput, taamaattumillu oqaloqatigiinnermik ingerlatsisoqqaartaariaqarpoq.

Politikissaagut Kalaallit Nunarput inuuffittut pitsanngorsarniarlugu, innuttaasut tamarmiusugut ineriartortinniarluta. Nunarput Namminersulersikkumallugu.

Ineriartornaviangilagut allannguinngikkutta, ilaqarpugulli ineriartornermik kissaateqaatigalutik allannguinissaminnik kissaateqanngitsunik. Tamanna aqutissaanngitsutut isumaqarfigivarput, siunissami inuunermik allannguinissamik pitsanngorsaanissamillu suliaqartilluta tamatta unammillerneqartussaavugut, aamma ukunani suliani ingerlasuni;

- Aalisarneq pillugu inatsit
- Attassinnaanermut ineriartornermullu isumaqatigiissutissaq, iluaniilluni aamma akileraartarnermik akitsuusiisarnermilu aqqjissuusseqqinnerit
- Takornariaqarneq pillugu inatsisissaq.

Allallu siunnersuuterpassuit inatsisartuniit siunnersuutaasussat qilanaarivagut suleqataaffigissallugit.

Qujanaq upernaami ataatsimiinnermi naammassilersumi, suleqatigut Naalakkersuisut, Inatsisartut Kalaallit Nunatsinnilu innuttaasut ajunnginnerpaamik aasarsiorluarnissaanik kissaappagut.

Hans Peter Poulsen, Siumut